



# PROCLAMACION

## PRINS HANCRA

## PANCHO DOBLA

Nos,  
Prins HANCRA  
eligi unanimemente, democráticamente, inteligentemente, cu aplauso, respaldo y aceptación de mayoría absoluta, pa un hurado di hende cu conoce bon humor, pa e digno pueblo di Aruba;  
**PRINS CARNAVAL 1985**

**REY** di henter territorio liber pariba di brug;  
Doño di Kibaima y tur otro princesa indian, pero soltera;  
**CASIQUE** cu penacho di oro;  
**GRAN DUQUE** di Zuid Cura Cabay Independiente  
Comandante di Bario di Carnaval cu Status diferente, **BRAZIL**;  
**EMPERADOR** di SMAL, incluyendo territorio di Sea-Berth

**PANCHO DOBLA**;  
Pa destresa, inteligencia, sabiduria y gracia di PRINS HANCRA;  
**SIRBIDOR** di pueblo di Savaneta Pariba  
**GRAN MAESTRO** di Byerlite y vecindario;  
**GENERAL** di dos strepi geel y un strea corra, di Butucu y Palo Marga;  
**TENIENTE GOBERNADOR** di Rooi Master, Rooi Congo, Rooi Hundo y Rooi Spoki;  
**PATRONO** protector di tur mosa cu Status Aparte,  
**CONSEHERO GENERAL** di tur comision, y mision cu ta existi ariba isla di Carnaval, ARUBA;

### CONSIDERANDO

Cu pa sigui mantene exito den celebracion di nos carnaval na Aruba, ta mas cu husto pa tuma e siguiente puntonan na consideracion;

### TA DECRETA

- 1...Cu entrante awe **CURA CABAY** ta bira ciudad capital di Aruba durante henter temporada restante di **CARNAVAL 31**;
- 2...Studionan di **CANAL 90**, e klompi Oro, ta bira nos Palacio Central Banda Riba, Banda Bao Fanclub ta bira nos Comitiva Real y tambe Oficial.
- 3...Presidente di Banda Riba Banda Bao Fanclub, Robert "A" Geerman ta bira miembro Honorario sin honorario, pasobra pa dos aña consecutivo el a produci mandatarionan carnavalesco;
- 4...cu entrante awe, lo modifica cambio den cobranza telefonico, eliminando "telimpuls" y introduci na su lugar "aftrek-impuls";
- 5...En bista di e critica y obhecion cu a bini di parti di orden di abogadoan y Trahadornan Social Preocupa, ariba "cachi candela" pa polisnan, nos a dicidi cu di awe en adelante, e arma oficial di polis lo consisti di arco cu flecha di indian, stichie, slinger y tambe blowpipe, esta e tubo pa supla pipita di boonchi. Tur esaki naturalmente despues di a consulta cu Alto Mando y cu cada polis a pasa den un entrenamiento extensivo na Academia Policial di Rooi Congo;
- 6...cu durante temporada di carnaval 31, como cu e pueblo a sufri bastante caba di aumento di tarifa di awa, y alavez cu spulamento di tubería no a duna ningun bon resultado ainda cu solamente gastamento di placa di pueblo, nos a dicidi di suministra awa di pos gratis, refina y destila den planta di awa di rooi na Bucuti;
- 7...Pa nos estudiantenan kendenan no ta bini na remarca pa obtene un beca di gobierno di Aruba of di Gobierno Central pa sigui nan estudio den exterior, nos ta decreta cu un persona di cada grupo cu participa den nos parada di carnaval, lo haya un beca di regalo. Nivel di estudio no ta haci diferencia den e caso aki. Sea cu e tin eerste klas Lagere School of hogere klas VWO, e ta haya beca basta cu e por demostra por escrito cu el a participa den nos parada di carnaval 31, pero comportando su mes manera nos ta spera di un bon carnavalista y yegando te final di ruta. Si e falla cu e condicion aki e lo mester paga tur cos back, mas 31 opcenten; esta un opcent pa cada aña di carnaval.
- 8...nos ta decreta cu tin 5 lugar na Aruba cu nos lo cambia nan number entrante mañan.  
Fransé Pas lo bira Berea Frances  
Meiveld ta bira Mitar Sabana  
Plantenrust ta bira Sosiego di mata  
Morgenster ta bira Strea di Madruga  
y Vader Piet ta bira Pachi Pe.  
Motibo di e cambionan aki ta cu dentro di algun luna nos ta drenta den cambio estatal, pesey di awor caba mester cuminsa cu 'papiamentizacion' di nos nombrenan geografico.
- 9...Nos a institui un comision pa propone tambe cambio di nombrenan multinacional. E comision mester entrega proposicion pa nombrenan nobo cu mester bini na lugar di Lago Colony, Lago Heights, Lago Ville, Esso Heights, Esso Ville, Lago Sport Park tambe Esso Servicecenter y Lloyd G. Smith Boulevard;

10...Durante concurso di calypso y roadmarch, nos a sinti e cayente di musica y di hende. Ta bon mes cu awa a yobe sino nos lo a haya un explosion di grado mayor, debi na e aumento di 'steam' humano Sport Park.  
Tin un decision interesante cu nos a tuma en coneccion cu e contest aki.

A) Lo sera asegurado colectivo pa tur participante y musico contra coriente y posibel daño na aparatonan musical pa motibo di yobida.

B) lo nombra un persona special pa registra tur fanatico cu a baha cu griep of cu dengue, of cu nan presion a subi di mas e anochi ey. Tur fanatico cu a bira malo tin derecho ariba caarchi di doc-ter gratis sin intermediacion di diputado.

Awor ta bin e cos: Pa por eligi e persona spcial aki, como conocedor di tur reglanan di democracia, nos lo tene un referendum. Aunque nos sa di antemano kende e lo ta, e referendum lo dicidi ariba sea homber of muher, pa cumpli cu democracia existente ariba nos isla.

11...Pa motibo di inkrimping, nos a decreta cu lo elimina tur servicio di informacion di gobierno, y usa Centrale Post di polis diariamente pa tene nos pueblo informa di acontecimentonan ariba nos isla, ya cu a keda constata cu tin mas scanner na Aruba cu tin radio y television.

Como cu decision di gobierno ta cu lo no permiti trahamento di overtime, nos a dicidi di introduci trahamento extra ora aunque mester traha mas di 24 ora pa dia, ya cu den temporada di carnaval tur ley por sermodifica

12...Como cu nos ta na altura di frustracion den seno di empleadonan publico pa motibo di 'Inlevering' a dicidi pa tene un loteria nacional cu un millon Arudollar na premio, pero sin aproximacion. E sorteo lo tuma lugar dia di kimamento di momo. Tur envelop bashi di empleadonan publico lo bay den tombola di lotto pa carnaval y ta ser spera so cu nan lo no kima e anochi ey.

13 Como cu e personahe activo, respetabel y honorable di Carnaval, Sr. Edwin Zichem ta baha cu pension di SAC, a dicidi pa honre cu condecoracion den orden di Chubato Gengo, pero como cu Asoma a honre caba durante concurso di tumba, a dicidi pa regale un klomp hulandes pa disfruta aki algun siman di Vierdaagse na Hulanda, cual caminata ta su hobby anual.

14...pa soluciona problema di gasoline den futuro ta prohibi tur bar romshop, establecimentonan cu ta bende alcohol y importadonan di tin stock alcoholico den nan poder. E alcohol aki lo mester wordo deposita den e planta pariba di Sea-Berth, pa ser converti den gasoline pa futuro. Pa garantiza transportacion, lo importa ademas algun bario di raza como reserva pa Arubus.

15...Ta un tradicion cu anualmente ta mishi cu funcion di nos prome mandatario. E aña aki Nos gezaghebber lo tin un tarea di supervision.

A) nos ta mande ariba Sero Colorado pa vigila desmantelacion di Lago, pa motibo cu tin convenio cu e tereno mester keda LIMPI LIMPI

B) Nos gezaghebber lo din dos siman tambe pa supervisa labamento di e pitch na Grapefield cual, prome cu carnaval caba mester keda LIMPI LIMPI.

C) Cu colaboracion di Juancho Pablo, Gezaghebber lo participa den parada cu un Papamobil, pa proteccion contra webo batata of tomati putri cu amanan di cas lo por tira ariba dje pa e aumentonan drastico cu a ser tuma. E glas di e Papamobil lo percura pa nos gezaghebber keda LIMPI LIMPI.

D) Nos tin bon curazon tambe. Pa no laga nos gezaghebber muri di hamber durante su tareanan dificil, nos ta regale 4 papaya verde. (E ta gusta come papaya stoba bo sa!). Pero despues di casca nan e mester percura pa tira e casca den drum pa nos Aruba por keda LIMPI LIMPI.


### CONCLUSION

Carnaval 31 mester keda algo exclusivo na mundo. E mester bira masha anima y alegre y mas principal, un atraccion incomparable. Nos Carnaval mester keda marca historia como esun mas sigur na mundo, y esakinan lo ta posibel solamente cu cooperacion di un y tur, bon voluntad y participacion activo di henter comunidad. Duné tur apoyo posibel. Pa boso nan tur nos mihor deseonan pa un feliz carnaval 1985

Pancho Dobra ta keda encarga pa ehecuta e decreto aki di tal manera cu el a ser formula y presenta.

Duna, firma y sella  
na Palacio Central y Castillo Presidencial,  
Aruba Isla di Carnaval  
3 di Februari 1985

PRINS HANCRA



PANCHO DOBLA

GFT/GVS/HCN

DESIGNED & PRINTED BY :

IMPRENTA NACIONAL ARUBANO (DIARIO)